



UKA 2018/168  
29. oktober 2018  
Bentiaraq Ottosen

**Nunatta kujataani aalisarnermut nunamilu inuussutissarsiornikkut periarfissanik  
tikkuaallunilu suussusersisussamik Naalakkersuisut UKA2019-imi  
saqqummiunneqartussamik nassuiaasiornissaat pillugu Inatsisartuni aalajangiiffigisassatut  
siunnersuut.**

(Inatsisartuni ilaasortaq Aqqaluaq B. Egede, Inuit Ataqtigiit)

Siunnersuuteqartumut Aqqaluaq B. Egede, Inuit Ataqtigiit saqqummiusnaanut qujavugut.

Nunatsinni inuussutissarsiutitut pingaarnersaat aalisarneq, aallaavigalugu aningaasarsiornitta saniatigut ataavartumik nunami imaanilu inuussutissarsiutitigut pilersitsiviunissaa Atassut-ip pingaartitaraa.

Nunatta kujataa inuussutissarsiuteqarnikkut assiigiinngitsunik periarfissanik ulikkaarpoq, soorlu Savaateqarneq, Nunaateqarneq, Aatsitassarsiorneq, Takornariaqarneq, Aalisarneq il. il. imminut pilersorsinnaasumik siunertaqartumik ingerlatsiviusumik qulakkeerneqarsinnaasoq. Naak ilaatigut inuussutissarsiutit ataavartumik ingerlanneqaraluartut inerisartuarnissaanik kajungilersitsineq suliffippassuarnik aningaasarpassuarnillu isertitassatsinnik kinguneqartussaasoq Atassummiit isumaqarpugut.

Nalunngilarput nunatta kujataani Naalakkersuisut immikkut ittumik iliuuseqarsimasut, tamanna iluatsilluaraluartoq kisianni Atassummiit naammagisimaarsimannngilarput inuerukkaluttuinnarneq nunatta kujataani ukiuni kingullerni annertusiartorsimammat. Taamaattumik iliuuseqarnitsigut isumaqarpugut tamanna qaangiinarneqarsinnaanngitsoq suliffissanik pilersuisoqartinnagu, iliuuseqartariaqarpugulli.

Unammilligassanik ulikkaarpugut, immitsinnullu aperisariaqarluta. Suut ineriartortinneqarnissaanut aallaaviussanersut suullu uukkatarineqassanersut. Isumaqarpugut tamanna aalisarnikkut kisimi periarfissaanngitsoq, ilisimagatsigumi inuussutissarsiornerup sorlaa qanoq annertutigisoq sumullu attuumassuteqarsinnaasartoq. Taamaattumik Atassut-ip anguniartuarpaa suulluuniit ineriartortinneqarsinnaasut aningaasaliinitsigut piusinnaasut qulakkeerneqarnissaat.

Aalisarneq annertuumik nunatta kujataata kangiani ingerlanneqartoq Atassummiit isiginarparput, tassani pisassiissutigineqartut ukioq kaajallaallugu Nanortalimmut suliffissaqartitsilluarnerat ilisimavarput. Tamanna aamma kujataani illoqarfiit akornimminni iluaqutissiisinnaanerat ujaruiffineqarnissaa Atassummiit Naalakkersuisunut kaammattuutigaarput ukioq kaajallallugu Illoqarfinni pingasuusuni suliffissaqartitsinnaammat.



Atassummiit isumaqarpugut tamanna susassaqartut peqatigalugit nunatta kujataani inuussutissarsiorneq siuarsarneqaqqittariaqartoq periarfissat allat aamma assakartillugit ingerlalertornissaat anguneqassammat.

Siunnersuuteqartup siunnersuutaanut ilaliinitta takutippaa qanoq Atassummiit politikikkut sinaakkutinik ineriartortitseqataarusussuseqarnerput. Piffissanngorsimavormi nunatta kujataa ineriartorteqqinnissaanut aqqutissiussinissarput, Naalakkersuisut kaammattorpagut suliat ingerlareersut attatiinarnissaanik ineriartortitsinissaq ingerlanneqassasoq, nunatta kujataa inuussutissarsiornikkut immikkut ittumik ineriartortinneqarnissaa anguniarlugu.

Siunnersuut taperserlugu aalisarnermut piniarnermut nunalerinermut ataatsimiisitaliamut aamma inuussutissarsiornermut nukissiuteqarnermut ataatsimiisitaliamut ingerlateqqinneqarnissaa innersuupparput.